



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Tim Southee World Cup nung masayatetsü akok

Russia temenen dak temolung alemla masü: Zelensky

VOL. XX NO. 340 (ADOK 340) DIMAPUR YANGTEPNÜ (THURSDAY) RONGJUI (SEPTEMBER) 21, 2023 ₹ 5.00

## Lok Sabha-i Women's Reservation Bill agizükogo

**New Delhi, September 20, 2023 (Agencies):** Bodbarnü Lok Sabha nung Women's Reservation Bill 'Nari Shakti Vandan Adhiniyam' agizükogo.

Tanü Lok Sabha nung iba bill pusema votes 454 aser anema votes 2 agüja liasü.

'Nari Shakti Vandan Adhiniyam' ajanga General, SCs, STs telemsa asem nung tetsür nem shilem mekazütsüsü ta Union Home Minister Amit Shah-i ashi.

Election agiba sülen census aser delimitation maparen inyaktüsü

asere iba sülen bill mapa kuma inyaktüsü, ta paisa ashi.

Lok Sabha aser state assembly tem nung tetsür nem 33% lemzüksütsüba bill ya Mongulbarnü Lok Sabha nung benoka liasü. Union Cabinet-ibo Hombor Women Reservation Bill mulunga agizük.

2008 küm Manmohan Singh-i aniba UPA sorkari Rajya Sabha nung Women's Reservation Bill benok aser 2010 nung agizük. Ajüsüka Lok Sabha nungbo iba bill mebenok.

## NE shishilembartem conclave takok ngua agiogo

**Dimapur, September 20, 2023 (DPRO):** Mezüngbuba Northeastern States Chamber of Commerce and Industry Business Conclave (NSCCI) takok ngua agir tembangogo.

Niathu Resort, Chumoukedima nung anogo asemnü tashi conclave agiba sülen September 20, 2023 nü tembang. Iba sentong ya Confederation of Nagaland Chamber of Commerce & Industry (CNCCI) ajanga ketdangüsü agi.

Advisor to the Chief Minister aser Investment & Development Authority of Nagaland (IDAN) Chairman Abu Metha-i iba sentong nung jembidang tayongertem aser meta talang nungi shilem agi arur ajak dang pelaba metetdaksü.

Nagaland-i tayongzükba aika ajuruaka linük renlokba nung shilem agia arur ta Abu Metha-i ashi.

"Northeast region tejakleni aotsüla aser kasa terenlok alitsü nungdang. Asenoki wadang balala nung lanurtem asoshi maongka agütsüsü. Technology

ajanga meimchir takütem melenshiogo anungji sorkar tanishirtem, sendaktepa alirtem, policymakers aser mapa inyaktertemi technology ajanga taküm jenjang tajungba akümba dang masü saka service delivery shitak agütsüsü atema amshitsüla" ta paisa ashi.

"Northeast ya eastern aser western regions atema kishi lir anungji Northeast nung shishilembartemi tajungba inyaka aotsü ayongzük" ta Mehta-isa shisem.

Northeast nung tourism sector tsütsü teinyaktüsü aika lir aser iba ajanga rongsenketzüng ajungkettüsü ta pai ashi.

"Northeast state tem külemi amalitepa inyaksangshitsüla aser tetoktepba masü saka telongjem nung temulung agütsüsü. Asenok kati ka tashi aser tashimaittem metettsüla aser ka kuma longjemtsüla. India-i alima sabang nung jenjang temabai atuba nung Northeast-i shilem agitsüla" ta Abu Metha-isa ayongzük.

## Wokha nung arem shidi ajanga timtem agütsüba tesemtem semdang

**Dimapur, September 20, 2023 (TYO):** Nagaland sorkar ketdangsurtemi Wokha district nung arem shidi ajanga timtem agütsüba tesemtem semdanga osang metetpelaogo.

Commissioner and Secretary Environment, Forest and Climate Change Department Y. Kikheto Sema, IAS den Vedpal Singh IFS, PCCF aser Chief Wildlife Warden, Pangloi, PA to Forest Minister, Suman W M Sivachar IFS, DFO Wokha Forest Division, Tokaho Kinimi IFS, Wildlife Warden, Dimapur Wildlife Warden, Wokha Administration aser Wokha Police den GIS teloki tesem balala semdanga senziüogo.

Mongulbarnü parnoki Mekokla yimtsüng semdang. Tanü parnoki Doyang Hydro nung Englan Range Village Council Union den senden ka amen aser Yanmhon Area Public Organisation den ajurutepe. Iba sülen Liphie aser Haiyian yimtsüngtem semdang.

Iba mapang GIS team-i shidi ajanga timtem agütsüba tesemtem nung drone amshia noksatem agia liasü.

Kikheto Sema-i aniba telokisa Sanis aser Bhandari Sub-Division kübok yimtsüng 200 nungi

lennirtem den senden ka amen.

"India nung shidi 30,000 shi lir aser iba nungi Northeast nung 10,000 tema lir. Northeast nung Assam nung shidi 5,700 tema lir, Meghalaya nung 1,754, Arunachal nung 1,614 aser Nagaland nung 446 lir. Nagaland nung shidi timtibaji Intanki National Park nung lir aser iba sülen Wokha, Mon aser Mokokchung, Zunheboto o Longleng district tem nung lir" ta Kikheto Sema-i ashi.

Akhidang Assam nungi shiditem senzüba lenmangtem nung meimchirtemi terenlok mapa balala inyakba ajanga Nagaland nung temalen shia aliba tesemtem nung shiditem alitsüsa akümer, ta pai ashi.

Arem shiruru aser meimchirtem tsüngda mepetmesü adokba azüoktsü atema Department-i policy ka yanglutsü. Department staff ajanga timtem aika ajurur anungji Department-i nübo meyipa repringshitsü, ta paisa ashi.

Department nungdakba ajiteta tawa tu Baghty Forest Range nung Assistant Conservator of Forest (ACF) ka mapa lemzüksüügo aser tanga division tem nungi staff kar yoktsü ta Kikheto-isa shisem.

## Minister Paiwang-i dengue atema rongdak senden ayonga amen

### DENGUE RESPONSE TEAM TENTETOGO; CONTROL ROOM LAPOKER



September 20, 2023 nü Minister P. Paiwang Konyak-i Dimapur DC conference hall nung Dengue atema rongdak senden ka ayonga amendang agiba noksa angur. ( DPRO DIMAPUR)

**Dimapur, September 20, 2023**

**(DPRO):** Health and Family Welfare Minister P. Paiwang Konyak-i Dengue kanga putetba atema September 20, 2023 nü Dimapur aser Chumoukedima District Administration tem, sorkar aser nija doctor tem aser department balala den rongdak senden ka ayonga menogo.

Senden nung Dimapur aser Chumoukedima DC tem, Dimapur MS aser CMO den ano nija mozü kitem nungi doctor temi tebilemstütem lemsatep aser iba sülen Minister Paiwang-i SOPs kar latet.

Iba senden nung Dengue Response Team ka tentettsü lemtet aser iba nung Chairman P. Paiwang aser Member Secretary CMO Dimapur asütsü shimtet. Iba telok nungsa C&S, H& FW, DCs, CP, Principal Director H&FW, MS, DMC administrator aser Private Doctors Association nungi teshimtet nübo kar züngsem

asütsü shimogo.

Dengue Response team ajanga dengue tashidak mazüok tashi mapang shia sendentem amentsü.

Minister Paiwang-isa District Task Force mapa tenzüksü tetuyuba agütsü.

Senden nung Dengue agi shirangertem atema contingency plan ka renem aser iba asoshi CISHR nung yipden 140 aser District Hospital Dimapur nung yipden 40 yutsüsü lemtet.

Maneni, asüng nungi Chumoukedima Police Hospital nunga dengue agi shirangertem asoshi yipden mekazüka ayutsü.

Nagaland aser Dimapur nung dengue osang metetpelatsü atema Directorate of H&FW nung control room ka lapoktsü telemtetba agi.

Senden nung dengue agi shirangertem platelets ajema akümba atema jembidang tanur ka dak-a platelet count 25000 tashi ajema aküm nunga

bleeding mesüra aser temang nung tanga tashidak tulu melira blood transfusion menüngdaker ta doctor temi ashi.

"Dimapur District Hospital nung blood segregation machine ka lir aser anogo ishika tsüngda ano ka bener arutsü. Külen, CISHR aser Kohima District hospital nunga blood segregation machine kaka lir" ta Minister Paiwang-i metetdaksü.

Paisa nübertem dang dengue wara mazüok tashi ainlen kangabo mesenzütsü mepishia metetdaksü.

Nagaland Chief Minister-i Paiwang Konyak dang Dimapur nung tüzümsüng timtem atema osang agiteptsü ashi aser iba atema Dimapur DC aser DMC Administrator nati pa den osang lemsatep.

Idangji Minister Paiwang-i sorkar dangi action plan ka renemer yoktsü aser drainage systems atsünga agiba indang report ka agütsüsü metetdaksü.

## Kohima nungi Mokokchung-i aoba gari tsükoka nisung 8 asü

**Mokokchung, Rongjui/ September 20 (TYO):** Kohima nungi Mokokchung tashi passenger anir senzüba Tata Sumo gari September 20 anepdang Kohima nungi Mokokchung-i arurba Tseminyu aser Wokha tsüngda Kandinu lushi nung LP truck gari ka den tsüktep aser iba lendong nungji nisung 8 asü.

Sumo gari nung amenertemji driver-ba dena tetsür 6 aser tebur 2 liasü aser parnok rongnung par 7-bo yangji atanga asü aser tetsür kabo mozüki bushia anir aoba mapang nung asü.

Iba lendong ya anepdang 7:40 meta atalok aser tasürtemji 1. Imlienla, 24 years (D/O: Imyangluba V/O:Lirmen); 2. Songlekhumba Chang, 26 Years (S/O: Yempusangpa V/O: Longra); 3. Nuncnuo Talie, 25 Years (D/O: Lt. Thekrubou V/O: Rusoma); 4. Imkongchila, 25 Years (D/O: Imlinungba V/O:

Chessore); 5. Temsutoshi Jamir, 32 Years (SO: Tinuyangba V/O: Lakhuni); 6. Sentimongla Imsong, 23 Years (D/O: Matong V/O: Yaongyimsen); 7. TiakalaAo, 23 Years (D/O: Nukshi Ao V/O: Mangmetong); 8. Nuksungienla Longchari, 24 Years (D/O: Lt. Tiakumzuk Longchari V/O Changki) ta jangaogo.

Iba lendong atalokba osang ya Wokha Police Station nung anepdang 10:30 shi nung angashir aser iba osang angazükli dang Wokha nung Home Guard, Civil Defence Personnels aser SDRF purtem iba amala lendong nung nungndakba osetsüsset aser Recovery Van dena o yariteper meyipa aru ta Wokha SDRF Sub-Inspector Pisamo Lotha ajanga metedaksü.

Additional Superintendent of Police Tseminyu-i ashiba Tata gari LP Truck registration number AS-096-6187 ya litem (sand) bener Merapani nungi

Kohima-i aorba liasü. Truck aser Sumo na tsükteper külen lenküboloni alu aser Truck jagi Sumo tema nungi neneta Sumo nung amenertemji yangji asü.

Additional Superintendent of Police Tsümenyu-isa ashiba agi iba lendong dak sendakba nung Tseminyu Police-i LP Truck Driver Pabitia Gogoi S/O Tankesuar Gogoi, Handy Man Nituraj Gogoi S/O Dhiren Gogoi aser Helper Ultam Gogoi S/O Indraswar Gogoi par asem pua Tseminyu Police ket nung yua lir.

Par asemprong ya Assam kübok Golaghat district nung alir aser FIR ka benoker bushitsüngdang agidagi ta paisa metetdaksü.

Nagaland state sorkaria iba gari lendong nung asür kibongtem den asüku lemsatepba den asür kibong shia nem sen Lakh anana agütsüsü ta Nagaland Chief Minister Neiphiu Rio-i metetdaksüügo.

### Dimapur nung 6th Regional SARAS Fair 2023 tenzükogo



Deputy Commissioner, Dimapur, Sachin Jaiswal, IAS ajanga September 20, 2023 nü Dimapur Club, Midlan nung Mission Director, NSRLM, Imtinenla lia 6th SARAS Fair tenzüksüba noksa nung angur.

**Dimapur, Rongjui/Sept. 20 (TYO):** Tanü nungi tenzükba 6th Regional Sale of Articles of Rural Artisans Society (SARAS) Fair ya Deputy Commissioner, Dimapur, Sachin Jaiswal, IAS ajanga Dimapur Club, Midland, Dimapur nung semzükja liasü.

Iba sentong nung tesemdanger tongti ka ama jembidang, Self Help Groups (SHGs) adenshia alidak densembra asoshi pelar, shirnoki pei sasa yanglutetba oset agi pei kibong yarir, ta Deputy Commissioner, Dimapur, Sachin Jaiswal, IAS ajanga ashi.

Naga nunger timba aluyimba aser danga sensaktepa aliba mapa inyaker, mozü mamshi süngjang-lijang züsenteaterm koba süngjang-lijang tajungtiba züsenteaterba nung maongka kanga tajung ka lir, ta pai ashi.

Ajisüaka cold storage peria maliba, market tesendaktep maliba aser bulk production maliba ajanga oset nung jenjang timba akumer. Anungji danga 'premium products' den tokrteptsüsa tali meranga inyaksüla, ta Dimapur DC-i ashi.

Pai SHGs tem dang Food Safety Standard Authority India (FSSAI) certification meshitsü ajungshi, kechiaser alima dang pei brand sayutsü kanga tongtipang aser iba certification

aliba ajanga SHGs tem bank nungi loan tezupaba nung agiteter, ta ashi.

SHGs loans dak alaka ano transportation vehicle alitsü asoshi Chief Minister Micro Finance Scheme nungi SHGs temi loan agitetsü, ta pai ashi.

DC Dimapur, Sachin Jaiswal-i SHGs tem dang social media nung yakyaka pei züsenteaterba/ yanglutetba osettem nüburtem dang sayutsü ayongzükja liasü.

Mission Director, Nagaland State Rural Livelihoods Mission, Imtinenla-i ashiba agi, local artisans, SHGs tem sapang kati anir arua pei züsenteaterba/ yanglutetba osettsüset ajungkettsü aser tetsüta nung shinga maidaktsü customer timba dang yoktettsü nükjidong nung iba sentong ya ayongzük.

Iba ama Fairs ayongzükba ajanga SHGs tem nem maongka tajungtiba agütsü aser parnok tsüngta tetoktepa tanüla adokdaktsü, ta lai ashi.

Sempet aser teimla aliba SHGs tem shimteta India tesem balala nung National SARAS Fairs nung shilem agidaktsü, aser yangji parnok indang products sayua ayoktsü maongka angutsü, ta lai metedaktsü.

NSRLM indang brand "Womenfolk" asoshi Food

Safety and Standards Authority of India(FSSAI) certification meshitsü atema NSRLM-i Department of Health & Family Welfare den Memorandum of Understanding (MoU) ka zülutepogo aser ibaji ajanga 'ingredients, nutritional values aser shell life' shidak packaging nung sayutsü, ta lai ashi.

Lai SHGs tem dang parnoki yanglutetba products tajungtiba nung amshitsü aser nüngdakba mapang NSRLM ketdangsur nungi teyari meshitsü ajungshia liasü.

SARAS Fair ya Ministry of Rural Development, Government of India indang mapatong ka lir aser Nagaland State Rural Livelihoods Mission, Department of Rural Development, Nagaland ajanga küm nung anaben ayongzük, ta laisa ashi.

Iba sentong nung menden State Program Manager Livelihoods (Non Farm), A. Tiasenba Longchar liasü aser Treasurer, Cedar CLF ajanga sarasadem.

Iba sentong nung Nagaland kübok district 16 nungi telok 37 den Meghalaya nungi SHG kati shilem agir. Iba SARAS Fair ya September 25, 2023 nü tashi alitsü aser anepdang 9:00 ako nung lapoktsü aser nikongdang 6:00 ako nung shibangtsü.

### Government ITI Phek nung 2nd Convocation sentong agiogo

**Dimapur, Rongjui/Sept. 20 (TYO):** Government Industrial Training Institute (ITI) Phek pur 2nd Convocation sentong September 19, 2023 nü Phek campus nung agia liasü.

Iba sentong nung tetushi tesemdanger ama SP Phek, Dr. Pritpal Kaur, IPS aser District Skill Committee tenung nung alakteta jaoker ama Mahatma Gandhi National Fellowship züngsem Sahail dena liasü.

Dr. Pritpal Kaur-i iba sentong graduate asüba

kaketshirtem den tajungshi o jembia liasü. Lai parnok dang temolungtetba tulu nung pei mangdang bushitsü ajungshi aser tarutsü nung jangratema alitsü asoshi temesepba mozü aser yi nungi pila alitsü nenshia ashi.

Dr. Kaur-i takok angrutem nem kulizüng kaket amoktsü aser parnok dang sorkar indang scheme balala nung entrepreneurship maongka bushitsü ajungshia liasü.

Mahatma Gandhi National

Fellowship tenung nung Sahail-i District Skill Committee indang jemi aser skill development nung rangloker sorkari scheme aser policy balala agütsüba indang angatetdakja liasü.

Iba sentong nung Er. Imchem Ao, Principal, ITI Phek ajanga tarur pela agizükba o jemi, graduate asürtem tenung nung Wewude, Carpenter Trainee-i o tatsüka jemi aser Adoveyi, V.I (W/s, Cal. &Sc) ajanga melepzüng o jembia liasü.



Dimapur nung tzünglu sashia aruba ajanga tzümetsüng agi kongshir aliba Vilhume aser SM colony nung alirtem nem DDMA Dimapur ajanga September 20, 2023 nü khen asoshi jenokdak ki agütsü.

### Tizit nung dengue awareness sentong agi

**Dimapur, Rongjui/Sept. 20 (TYO):** Indian Swachhata League 2.0 nung shilem ka ama Tizit Town Council ajanga September 20, 2023 nü ADC indang Conference Hall, Tizit nung dengue awareness aser mürekmejua alitsü yimyatem sayuba sentong ka ayongzükja agia liasü.

CHC Tizit nung Medical Officer, Dr. Sanjib Chowdhary-i iba sentong nung dengue tashidak indang jembidang, iba tashidak ya merila tetsür Aedes agi metepba nungi menar, ta ashi.

Dengue agi meneper temang metar, tekolang angor, teret teloktep ayanger aser ara adoker, ta pai ashi.

Pai dengue viruses tabu balala indang rateta ashi aser dengue nungi pila alitsü asoshi

mera balala agitsü ayongzükja liasü.

Tizit nung nisung pongu dak dengue putetogo aser parnok tajungba nung anepalutsü asoshi mozüki danga leni yokogo, ta pai ashi.

SDO(C) Tizit, Tumben P. Tsanglao-i nüburtem dang kilentzü aoba lenmang sadema aser junga ayutsü ayongzükja liasü.

Merila apokba tesemtem samadaktsü asoshi nisung aliba ki müketa tzü atüngdaka aliba indoktsü pai shia liasü.

Iba den külemi merila sü aser merila mozü amshitsü pai ashi.

Iba sentong nung lokti tentet balala nungi lenirtem, ward indang tir tem, GBs, DBs aser Tizit nung sorkar department aser Armed forces nungi ketdangsurtemi anir dena liasü.

### NSF-i Tseminyu nung asürtem asükhu lemsar

**Dimapur, Rongjui/Sept. 20 (TYO):** Tseminyu nung September 20, 2023 nü gari lendong ajurua nisung ti takim samaba osang angashia temolung ayanger, ta Naga Students' Federation (NSF) sangdong ka ajanga ashi.

Tang iba ama molung zürep mapang ozü sarasadem kinunger aser medemerem den lir. Anojungi item lanurtem takum samaba asoshi onok temolung shirangba o agi peria melemsateptetaka par mandang

aser sempet bilemteta mangyim tejashi lemsateper, ta NSF tir Medovi Rhi ajanga sangdong nung ashi.

Mangyimer kibong, tembartem, kinungertem aser iba takoksa tia agi kongshir alir ajanga den NSF-i asükhu lemsateper. Parnok tanüla asen Tebo Tsüngrem den teti tatem maka tesunep nung anisüngzük lir ta meteta asenok ajak temolung nung anisüngzük angutsü, ta sangdong ajangasa ashi.

### Asetkong terenlok asoshi shisadokdena senden amen



Advisor, TN Mannen IAS (Retd.) kinungtsü Thangi Mannen, IAS (Retd.)-i senden nung adenertem den sensaksemba mapang tangokba noksa nung angur.

**Dimapur, Rongjui/Sept. 20 (TYO):** 23 Impur Assembly Constituency kübok Asetkong nung loktiliba aser rongsenketzüng terenlok temaba jenjangi ajungkettsü nükjidong nung Advisor, Law & Justice, Land Revenue, TN Mannen, IAS (Retd.) ajanga HoDs aser lokti tentet balala den shisadokden senden ka EAC Circle Kubolong kübok Asetkong Senden Salang nung September 19, 2023 nü ayongzükja mena liasü.

Iba senden nung jembidang, 23 Impur AC ya Constituency balaka lir, kechiaser yangi Impur nung libaliru tenzükba den Kubolong lir, koba Nagaland nung EAC headquarter tembotisang lir, ta Advisor Mannen-i ashi.

Ajisüaka Asetkong tia asadanga, temolung shirangtsü jenjang nung lir aser iba tia tajungbai ajungkettsü asoshi yangi aliba nüburtem dak keta lir, ta pai ashi.

Pai Asetkong nung ali kiburtem dang nüburtem ajangzüksü asoshi project aser scheme balala arudang molungsoa ali tenlatsü

ayongzükja liasü. Asetkong tsükong rangpen aintsü asoshi tzü-mopung den apet süngjang-lijang aser aonsotsü tsünütsü pai ayongzük.

Advisor Mannen-isa Asetkong tsükong ajungkettsü asoshi ajak lungiemer telemsa madoki inyaksü ajungshia liasü.

Sensaksemba mapang Advisor TN Mannen kinungtsü Thangi Mannen, IAS (Retd)-ia tourism aser horticulture nung ajemdaker alu ayimtsü teimla aliba lemsatepa liasü.

Tarutsü nung inyak ajungtsü project kar lir, saka item maongka agitsü nüburtem tejangraba alitsüla, ta lai ashi.

Iba senden nung EAC Kubolong, Seyevilie-i Kubolong Circle indang tongmelang agi osang agüja liasü.

Iba senden nung EAC Kubolong Circle kübok HoDs ajak, yimtsüng shia nungi chairman, secretary aser VDB secretary densema züngsem pongu-ngu, Kubolong aser Yisemyong Adhoc Committee nungi ketdangsurtem, Asetkong Mungdang, AKTM aser NGOs balala nungi lenirtem iba senden nung dena liasü.



September 20, 2023 nü New Delhi nung National Human Rights Institutions of Asia Pacific tetenzük sentong nung National Human Rights Commission (NHRC) Tir, Justice Arun Kumar Mishra-i linük Tir, Droupadi Murmu nem tetushi agütsüdang tangokba noksa nung angur.

**BJP atema Women's Reservation ya yimtenren onük ka masü: Amit Shah**

**New Delhi, Rongjui/Sept. 20 (Agencies):** Bodhbarnü Union Home Minister, Amit Shah-i, BJP atema Women's Reservation ya yimtenren onük ka masü, saka tagizüktettsü onük ka lir, ta ashi.

Lok Sabha senden nung Women's Reservation Bill benoka o lemtepa mapang nung Shah-i, BJP-i iba Bill nung ajemdaker politics masayar, kechiyong iba bill ya linük nung tetsürtem ajungtsü atema dang lir ta süoki ia agir, ta ashi.

"Party kar atemabo tetsürtem nem tashi agütsüba ya yimtenren onük ka asütsüa akok, aser party kar atema election nung takok angutsü atema hadir ka asütsüa akok. Ajsüaka BJP aser Ato kilonser Modi atemabo tetsürtem nem tashi agütsüba ya yimtenren onük ka masü saka tagizüktetba onük ka lir," ta pai ashi.

Centre nung Narendra Modi-i aniba sorkari tetsürtem atema mapatong balala inyakba metetdakja Home Minister-i, "Ozü sorkari tetsürtem nem LPG connections million 100 agitsüogo aser ki million 400 sütsüogo," ta metetdaksü.

'Beti Bachao, Beti Padhao' campaign dak sendakba nung Shah-i, iba ya ajanga tetsürtebur ratio tajungba kumogo aser tetsürtem school zungtur anenba kanga ajema kumogo, ta ashi.

Union Home Minister-isa, Jan Dhan accounts shilem 70 bo tetsürtem tenung nung lir aser scheme balala atema lemzüksüba sen ajakji tetsürtem indang account nung

inoktsür, ta ashi. Shah-isa, iba bill ya kodang Lok Sabha nung agizükdir Lok Sabha aser state assemblies nung menden 1/3 bo tetsürtem atema mekazütsütsü, ta ashi.

Ato kilonser Modi tenung sanga Shah-i, Modi-i Gujarat Chief Minister menden nungi anenba mapang nung pai pa meyong sen ajakji Gujarat Sachivalay nung mapa inyakertem jalatem shisaliok atema tenla agütsü, aser ibaji ajanga pai iba linük nung jalatem aser tetsürtem atema bilemetsüba kuli sayur, ta ashi.

Home Minister-isa, "Tang agi Women's Reservation bill ya pongubenbuba benoker. Devegowda nungi Manmohan Singh mapang tashi nung iba bill agizüksü atema pezüben meranga liasü," ta shia pai, süra kechi kuli ajanga iba bill ya magizüket?, ta asüngdang.

Lok Sabha aser yimtenren party ajaki melungtepa Women's Reservation Bill agizüksü mepishia Amit Shah-i, telemteba agiba nung BJP-i tetsürtem nem shilem agidaksüner, ta ashi.

MP tem ya telesa asem lir, aser itemji- General, SC aser ST lir ta shia Shah-i, kodang iba bill ya agizükdir tetsürtem telesa asemprong nungji menden shilem 33 shiteta yutsütsü, ta ashi.

Shah-i, Delimitation Commission-i koba constituency tem tetsürtem nem wazüka yutsütsüar telemteba agitsü, ibayongji iba bill nung mapang telatetji 2026 kum lateta lir, ta ashi.

"Nenoki iba (Women's

Reservation Bill) ya pusemyonga mesüra pu-masemyonga 2029 kum nungbo ataloktsü. Election agiba sülen Census aser Delimitation agitsü, aser tetsürtem nem menden wazüka yutsütsü atema anogo ka arutsü," ta pai ashi.

"Iba bill ya pu-mesemra kera magizüktettsü, anungji tajungtibaji- iba bill ya pusemetsüla," ta pai Lok Sabaha MP tem dang mepishia metetdaksü.

128th Constitutional Amendment Bill, 2023 ya agizüka ozüng kumra Lok Sabha aser state assemblies ajak nung tetsürtem nem menden shilem 33 wazüka yutsütsü.

Bodhbarnep Lok Sabha nung Union Minister, Arjun Ram Meghwal-i Women's Reservation Bill ya benoka liasü. Iba mapang nungji pai, tetsürtem nem tashi agütsütsü atema iba bill ya kanga tongtibang aser iba ya ajanga alima dang lenmang sayutsü, ta jembia liasü.

September 21 nü Rajya Sabha nunga iba bill benoka o lemteptsü.

Party aikati iba bill pusemer, ajsüaka AIMIM MP, Asaduddin Owaisi-ibo, women reservation bill ya paibo anemer, ta shiogo.

Iba bill nung Muslim aser OBC nungi tetsürtem atema menden shitetja mali, anungji pai iba bill anemer, ta metetdakja liasü.

Lok Sabha nung AIMIM leniri, "Iba Bill ya India nung Muslim nung anema lir. Iba Bill ajanga Muslim nung ashioktsür," ta ashi.

**India-i Canada nung aliba India nungertem dang kumdangtsü tuyur**

**New Delhi, Rongjui/September 20 (Agencies):** India ketdangsertemi sensotem dang Canada-i aotsü tebilemba ali nunga maotsü aser tang Canada nung telidakpur India nungertem danga kanga kumdanga alitsü metetdaksüogo.

India aser Canada napronglai ketdangser kaka jendokogo aser linük ana tsüngda tensa tamajungba akümba mapang ka nung India-i sensotem dang tekumdangtsü osang ya metetdaksür.

Canada-i, Sikh nung Separatist lenir ka tepsetba ken o nung India-i shilem agia ali asü maliar bushisingdangdar, ta metetdakja liasü.

Tesüiba ita ishika linük ana tsüngda tesendaktep jenjang tamajungba dang küma arudar.

Bodhbarnü India foreign ministry-i, "Canada nung India anema inyakba mapatem aser yimtenren nung ajemdaker tesempa agi inyakba mapatem bulua akümba nung ajemdaker Canada-i aotsü tebilemba ali nunga maotsü aser tang Canada nung telidakpur India nungertem danga kanga kumdanga alitsü mepishir," ta metetdaksü.

Anüolen aliba linüktem nung Sikh separatists-i Khalistan mesüra Sikh nung temeja li atema takhangba agütsür. Khalistan movement ya India nung 1980s mapang tenzükba sülen Sikh nütsüng teimba aliba state- Punjab nung telungpur tebilemetsü adoka liasü, saka India nungbo ibaji nokdangtetogo. Ajsüaka Canada, Australia aser UK nung Sikh nungertemi maneni

Khalistani atema takhangba agüja longkak aiter.

Bendanglen Sikh nunger nütsüng teimba aliba linükji Canada lir aser iba linük nung Khalistani pusema longkak maneni aiter. Taküm June ita nunga India-i Canada ketdangsertem den par linük nung India nungertem security tebilemetsü atema lemsatepa liasü.

Osang angazükba agi, Canada-ia par sensotem dang India-i maotsü tekumdangtsü metetdaksüba den külemi India nung aliba Canada nungertem dang kanga kumdanga alitsü metetdaksüogo.

Hombarnü Canada Ato kilonser Justin Trudeau-i, Canada nunger senso Hardeep Singh Nijjar tepsetba nung India sorkar ketdangsertemi shilem agia ali asü masüar Intelligence agencies-i bushisingdangdar, ta metetdakja liasü.

2020 kum India-i Hardeep Singh Nijjar ya kiralongrar ka, ta sangdonga liasü.

Taküm June 18 nü British Columbai nung Sikh nunger tekülem ki ka kima Nijjar pa meyong gari nung lia prangpong amer nisung anati pa khaseta liasü.

Hombarnü Parliament nung jembidang Canada Ato kilonseri, "Canada nunger li nung bendanger sorkar kati Canada nunger senso tepsetba nung shilem agia lira ibajibo asen linük anema inyakba lir aser tagizüktettsüla masü," ta metetdakja liasü.

Iba dak sendakba nung India-i, Canada-i par lima nung Khalistani kiralongrartem nem tejenokdak agütsür, ta aitsüogo.



September 20, 2023 nü New Delhi nung Lok Sabha senden nung Congress MP, Sonia Gandhi-i jembidang tangokba noksa nung angur.



September 20, 2023 nü New Delhi nung Chief Election Commissioner, Rajiv Kumar den Election Commissioners- Arun Goel aser Anup Chandra Pandey nungeri Election Commission of India indang comic kaket 'Chacha Chaudhary and Chunavi Danga' sayadang tangokba noksa nung angur.

**FORM WIN 43**  
[See rule 100]  
BEFORE THE NATIONAL COMPANY LAW TRIBUNAL  
BENCH AT GUWAHATI  
IN THE MATTER OF  
**INFRASTRUCTURE DEVELOPMENT COMPANY OF NAGALAND PVT. LTD**  
(Company incorporated under Companies Act, 1956)  
Petition NoCP No. 08/GB/2022of 2022  
**Sen aputsürtemi kuli sayutsü atema notice advertisement**

Temalen shia aliba sen aputsür company dang sentsüh mesüra tangutsü aliba kuli Company Liquidator nem agütsütsüba akümer ta sangdonger; iba kuliji office of the Company Liquidator House No. 15, Chandra Chowdhury Path, 1st bye lane, Bhetapara, Beltola, Guwahati 781028, Assam (Email: ujwalkalita1@gmail.com) nem October 5, 2023 mesüra iba anogo tashi nung post ajanga Company Liquidator nem agütsütsüla, aser ibaji shia aliba anogo tashi nungbosa atongtsüba agütsütsüla, affidavit ka nung sentsüh mesüra tangutsü alubaji FORM WIN44 nung parnok tenungtem, addresses aser sentsüh mesüra tangutsü aliba tejangja aser section 326/327d kübok title agütsütsüla. Sen aputsürtem kari danga kuli affidavit ji temalen shia aliba mapang tashi nung magütsütetra sentsüh kuli magütsü tashi senotsü alemba nung mezungoktsü.

Sen aputsürtem shirnoki kuli agüja lir, nungdakra Company Liquidator-i parnok nem notice agütsütsü, anungji pa mesüra pa tenung nung item ama sentsüh mesüra tangutsü aliba bushisingdangba nung adentsü atema notice nung shia aliba mapang aser tesem jagi arutsüla aser sentsüh mesüra tangutsü aliba indang kuli agütsütsüla.

**Anogo: September 21, 2023**

**CS Ujwal Kumar Kalita**  
Company Liquidator

**IBBI Registration no. IBBI/IPA-002/IP-N00952/2020-2021/13157**



## TIR YIMYIM YIMOBILEM (EDITORIAL)

DIMAPUR YANGTEPNÜ, RONGJUI (SEPTEMBER) 21, 2023

### Peisasa tim atemertem

**N**agaland nungbo menoknok tesashi manoker, yipru maiter, nisungi maremtetsüsa anü tsüka mapur aser temekonga memekonger aser tzümetsüng lendonga mataloker, anungji alima nung lendong maliba aser matalokba limaji Nagaland ya lir. Ajisüaka, talisa Dimapur ama lenden lima nungsa süaka tsünglu minute ishika maneni arura kiyong aika motzü agi mobangba tebilemtsü yabo asenoki asenoksasa asenok tim atemtsü yangluba tebilemtsü lir. Atangji, lendensa süaka Dimapur yabo tzü agi metsüngbangtsüsa Tsüngremibo yangluja mali, kechiyong tenemlen nungi motzü yimzüka aluba ajak ayongayonga yimzüka aotsüsa ayongnu agi meketbanga lir. Item ayongnutemji Dimapur nung alirtem asoshi Tsüngremi yanglutsüba kilentsütem lir. Ajisüaka, nisungtemi pei agitsü aser pei ajungtsü dang bilema inyakang motzü yimzüka aoba kilentsü aser ayongnutem ajak onbanger ki asür, iba jagi tzünglutsü yimzüka aolena mali, tangar kima masü pei kima metsüngbanger. Ibaji nüchi purtemi inyakba mapabo memesük. Tanü asenok merumeruba aser pei kisüng ajungtsü aser ajangzüksü bilema inyakba apibo asenok ya tangar alidak masü arem nung kija ali nungang jangratema alitsüba purtem lir. Ajisüaka, asenoki asen kijaa melinür aser tangar den külemi alitsüla nisunga masü ta asenok ya alima menentsütsü aser raksatsütsü yokba purtemang mesük. Asenok alidak tsünglu tera aruba agi tzümetsüng akümba tesemji tangar kima masü, aji asen kima aser tangar kiyong masü itemji asen kiyong atsüngbanger. Itemji kodang bilemdangdir, asen alidak asen kima aser asen kiyong nung asenoki asen alitsü aser asen agitsü kiojen yangluba ajanga motzü aodaka makatsüsa asenoki inyaktetba aser litetbaji taaktsüka lir. Tanü asenoki asen alidak yamaji benjaa toktsür asenok asüng alima nungi pilatsü. Ibaji kodang bilemdangdir, asenoki motzü sademsadema yimzüka oa aliba ayongnu aser kilentsü onbanger ki yangluba tetezü aser tajangzük to kecha mali, asensasa asen timatemtsü yangluba dang lir ta angatetsü. Tsüngremibo asenok ayongayonga alima lendong aika nungi kümzüka alitsüsa yanglutsü ser nung asensasa asen lendong ajurutsüsa yanglubaji ak tzü chigutsü amai dang lir. Asenok ajaki tangar den dang külemi lokti kümer linür saka ali akha ka atema asen kidangertem den meputepteter. Asenoki asen dena yimkong jajatsü atema asen kima asen li lepzüka agütsütsü melen atsünga- atsünga oa agir. Asenoki tangar den kiyong ka nung külemi linür, iba jagi asen kija arem nung malir, saka asenoki asen kima ajanga kilentzua meyokner. Aji oda, asen kilong aser kima nung okdenba jana ajak asenoki asen kima kilentsü nung okzüka toktsütsü mesüra aleper bener oa tangar kima yutsür. Iba shisatsü jagi kodaser asen alidak yimkong lenmang sadema alitsü? Kodaser asen alidak merüka alitsü? Kechiba asen ki dena atsüngbanga tzümetsüng matutsü? Tanübo tsünglu tzü agi tzümetsüng kümer mapang tatsüka timatemer dang saka asenok merumeruba ajanga asenok ajak khen nung nembanga asütsüsa lendong ataloktsübjaji asenoki kiojen yangluba ya asütsü. Aji oda, asenok onsara merumeru nisungtem asünungji, ki o kin a tsüngdaa temanga meitetsüsa ki tulu aser talang tsüngteptsüngtepa yanglur. Ano, shisabolutsükaji item ki tulu aser talanglang atongtepa tua yangluba kitemji kisüjensü nung mongin nisungtemi ali telong aser tema ajak tendanger yangluba kitem masü saka peisasa ayanger kar anisemer yangluba kitem lir. Itemji tang anokba menoknok dang nungi tera agi tali anak nung, ajung agi yangluba ki laor amai ka madak ka aser ka madak ka ta laoadoktsü. Asenoki rongsen onsara penbua aküm nungji, asenok aikati taküm ya tetezü keta jangratema alitsü bilemer masü saka sen ngura ojang aser sen arura teperi ta bilema peisasa pei dena lendongi aitsüsa mashimashi inyaker. Itemji khen bilemdangdi aser joko asenok iba putu nungbo kiojen yangluba nunga aser yimkong lenmang aser kilentsü shitak ayuba maparen nunga, alima nung khen alidang aseni yangluba timtem agi okrongtsüba masü saka asen alidak sademsadema aser topur jungjunga alitsüsa asenoki anir inyaktsubaji asen kin aser asen kibong mapa asütsü tim.

## OLEMSABANG

### MISSION TO THE NAGAS ASER OKADAK AROGO OTSÜ TEMETEN BUSHIBA

~ Walu Walling & Wati Longchar

*(Yashi adok nungi...)*

Ano ajaki metetsüba kaji Clarki anir mezüng tamangertem den yim aser arogo tasen ka akümba ajanga, Khristan tamang tain kümdakja, Khristan libaliru sayua, merukmeju, ola-angla, Ao mungdang tenteta, school lapoka, kaket-ken-o renokdakja Naga nunger tenuk lapokdaktsü. Khristan tamang wazüka ayuba, züindaktsüba den lokti taküm nung temelenshi, shisaliok, kaket-ken-o renlokaktsüba nung Naga nunger otsü nung shilem tulutiba agibaji Molungyimsen ta angateter aser aji shiangaia rakzüksü makok. Ashiko Clarki anir Molungyimsen ya kümteta mao ka asübo, Bronson-i Namsang nung mission centre lapokdang shibangba amai ajurur lila ta sensaksemer kari shisema liasü.

#### Lim arogo otsü nung ABAM

ABAM ya Ao arogo ajaki akümba Mungdang ka asü nung "ABAMI kechi ashir?" ta aiben asüngdang. Lokti liromedema aotsü asoshi telok pangzüng ka alitsübjaji tim. Naga nunger yimtsüng ajak independent republic ka ka ama lia aru nung yim shia otsü balala aser inyakyim balala lir. Anungji guidance aser yimjung o agutsüba dak alaka lim otsü nung tebang maitajungba. Missionary putu Molung yim ana nung arogo disband asüba/masüba, arogo medangdangi lia aruba/maruba, rishikangshi asüba/masüba, küm balala nung arogo tenzükshiba otsü amala ya internal otsü aser itemji Naga/Aoarogo otsü mekümdaktsütsüla. 1872 sulen kechisa ataloka aru aji Mulongkimong aser Molungyimsen lim arogo jurila otsü. Lim arogoia jurila otsü nung ABAM nem khuret magutsütsüla aser ABAMI takok tashi obendang/oshilang magutsü tajungba ta sensaksemertemi lemsatep.

Ashi ama, ABAM ya Aor arogo ajaki kümtetba Mungdang. Mungdangi telemtetba agir aser melenshitsüjia Mungdang dak tashi lir. Ashiko, taoba Mungdang telemtetba kar dak ajemdaker Sanen Ludeni Molungyimseni mepishiba magizük alitsü. Molungyimseni parnok tebilemba lemsateptsü sabang mangu nungji okadak jembitsü o agutsü sudi. Mungdang telemtetba aser Molungyimseni okadak o benokba anapronglaji tim amai, saka telok anapronglai atsü-anem kara tangatetep kati arutsü ana nung dang lir. Anungji okadaki maodang ABAM Sanen Luden aser Molungyimsen arogo, aser kokra Molongkimong arogo dena khen ajurutepa sensaksem kadaktsüner ta YSS sensaksemeri temepishiba shisem. Yisu Khristai sayuba ama temeim, taochi aser amalitep ajanga dang chichiba yimjung bener arutetsü akok ta tangatetba nung iba mensem kadaktsüner ta ajang ajangja mepishiba shisemer.

Asen Aor Tsüngremer taoshi tulu ajanga Naga kin rongnung mezüngbuba Yisu yimsu tajung agizükba kin aser America lima nungi arua parnoki taküm bendanga aguja küm 83tashi asenok yaria, sayua liasü. Ibai Ao kin dak malangba temoatsü ulura. Paronki bendanga aguja tenzükba ajanga Ao kin Naga nunger rongnung mezüng tenuk lapoker aküm aser tanü tashi Naga nungeri Aor dang "Pioneer" kin ta ajar. Iba temoatsü ya khuret ka ama agizüka tsürabur putu nung ama Khrista Osangtajung bener aotsüba aser taküm libalroi sayutsübjaji asenok khuret lir ta angatetdi. 150 jubilee among tenung nung Tsüngrem tenung ajungkettsütsüba aser missionary, tsüraburtem shirnoki taküm bendanga aguja Khristan tamang agizüka nuchi bener arutsü parnok nem tenungsang agutsütsüba talang sur nung parnoka dena tenung menuk bener arutsütsüsa asenok konang bushitepa okadak noktaksüsa akümba ya maksu mapa ulura. Amangba pur ajak temulungjang bushia, temeim aser ajemalu nung Khrista dangi meyiptsü atangji mapang tang ya lir.

Ano lephsia ashir, aiblena zülusema lira tatok meshir aser metongshia azüngtsü ayongzük. YSS ya tepu maket social media telok ka kong shisatsü balala lemsatepba sabang ka dang lir. Nisung kar shisatsü tasen kar ngur lira aji agi teperi. Tsüngremi iba ocet azünger temoatsü kadakjang ta sarasademer.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# N.C. nung aliba Arogo nung anogo ka kija nung nisung 282 bapti



North Carolina nung aliba Culture & Engagement, Biltmore Church nung baptiba sentong agidang tangokba noksa nung angur.

**September 20, 2023:** Tawa North Carolina nung aliba Arogo ka nung anogo ka kija nung nisung 282 baptiogo, ta pastor, Devin Goins-i metetdaksü.

Osangbener den jembidang Culture & Engagement, Biltmore Church nung pastor, Goins-i, "Iba ya Tsüngremi nisungtem melungjang nung jembiba agi dang lir," ta ashi.

"Iba dak alia onok team-i kija aika den sensaksema liasü aser tesüiba hopta aika onük jembidang baptiba indang kanga jembia aruogo," ta paisa ashi.

"Nisung ajak nem Khrista osangtajung angatetdaksütsü

aser pei taküm nung Yisu Khristaji Kibuba, ta nangzükdaksütsü atema onoki nijatem counselling agia liasü. Tsüngrem arakzüba mapang nung renema alitsü atema onoki inyaker, koba ajanga nisung aikati Yisu nütsüng akümtsü atema mera agia liteter," ta pai ashi.

Nisung noklang aikati Yisuji Kibur ta nangzük aser pei kija taküm nung Tsüngremi mapa inyakba kulisübaji jangratemsüka liasü, ta pai ashi.

"Khrista sülen anidaker ka atema Baptibaji mera tuluka agiba lir, ajisüaka ibaji tetenzüker

dang," ta pai ashi.

"Ozü staff temi maneni nisung ajak den sendakteptsü aser Laishiba tesayuba agütsüba den külemi Yisu sülen anidakba nung len anitsü," ta pai ashi.

North Carolina nung Biltmore Church indang campus tenet lir. Iba Arogo ya 1889 küm mezüing tenzükdangbo Fern Hill Baptist Church ta aja. 2008 küm tongti pastor ji Bruce Frank akümba sülen tesem aika nung iba Arogo ulushia liasü.

Tawa pastor Frank ya Southern Baptist Convention indang sexual abuse task force nunga Chairman liasü.

# Iran nung Khristantem dang longkak aitba nung shilem magitsü tuyur

**September 20, 2023:** Iran linük nung Khristantem dang longkak aitba sentongtem nung shilem magitsüla, mesüra aputsü, ta amokmerenogo.

Taoba hopta United States Commission on International Religious Freedom (USCIRF)-i Iran indang religious freedom report metetdakja liasü.

Iran nung tetsür ka, Mahsa Zhina Amini-i hijab (tekolak meyibangba sü) junga magiba agi apuba sülen police ket nung lia asü, iba sülen yaküm September 16 nungi tenzüka loktii sorkar anema longkak maneni aita arur.

Tenük kuli alirtemi ashiba agi, Guidance Patrol officers-i Amina dak kanga mejungi züka liasü.

La asüba sülen tetsür kariibo longkak aita yimjak nung hijab semzük aser kariibo kou-a mejeba liasü. Yamaji mapang talangka longkak aita arudang joko linük nung yimsü temeden atema-a takhangba agütsürtema aika kümogo.

Longkak ait tenzüka sülen nungi tang tashi nung Iran ketdangsertemi nisung 537 tepsetogo.

USCIRF-i, "Tamangba

yimsü temeden atema takhangba agüja longkak aiterem nem tasüba temerenshi-a agütsütsü ta Iran ketdangsertemi sangdongogo, yamaji longkak aiter aika tepsetogo," ta metetdaksü.

Tang Iran linük nung Khristan nütsüng 800,000 shi lir.

Osangbener den jembidang USCIRF Commissioner, Susie Gelman-i, "Sorkari Khristantem dang item ama longkak aitba sentong nung shilem magitsü tuyur. Khristantemi shilem agira aputsü ta amokmerenogo. Iba dak alia minorities nungi tetsürtembo jail nung ketdangsertemi tim mesüi benshir," ta metetdaksü.

Iran nung Farsi oshi nung Khristantem tekülem sentong agiba nokdangogo; iba denji külemi Laishiba nungi sayutsüngiba aser Khristan tamang indang sayutsüngiba-a ozüing alema lir.

Item ozüing alema inyaker Khristantem aputsü aser lisü agi areptsü.

2021 November ita nung Supreme Court-i, house churches nung adener Khristantemji linük security atema amokmeren masü

mesüra linük atema tsükchirtem, ta mezüingshitsü obendang agüja liasü ajisüaka Khristantem maneni apur.

Khristan melungtet telok-Release International-i Iran nunger ketdangsertem dang linük nung senso ajak nem yimsü temeden agütsütsüla, ta akhanger.

RI CEO, Pail Robinson-i, "Supreme Court-i Khristantemji linük tsükchirtem ama mezüingshitsüla, ta obendang agütsübaji onoki pelaa agizüker. Ajisüaka iba obendang yagi ano Iran sorkar ket matong aser Khristan reshikangshirtem menokdangteter," ta ashi.

USCIRF-i U.S. Department of State dang Iran linük ya maneni Country of Particular Concern (CPC) list nung züngoktsüla, ta takhangba agütsüogo.

Yaküm September 16 nungi longkak ait tenzüka sülen September 21, 2022 nü sorkari province ajak nung sepai commander tem dang timtem agütsürtem nokdangtsü tuyua liasü.

Taküm July ita nungi hijab ozüing shidak benshidaksütsü atema Police patrolling tenzüka liasü.

# ANOGO ABEN TSÜNGREM DEN

## TONGPANG SOBUTSÜ KAR

"Masü item ajak nung shibai asenok meim pa ajanga asenok takokertem dang nungia taoba. " -Rom 8:37

Temenen Shiba asen tsükchir lir, pa den tongpang raratsüji tamanger shia teinyaktsü anungji asenok; renemshitsü tenüingdaksü lir. Asenoki asen taküm nung Khrista Chuba kümdakja lir mali? 1 Yohan 4:4 "Tebusangtem nenokbo Tsüngrem nungi lir, aser nenoki parnok kokogo kechiaser alima nung aliba dak nungi nenok dak alibai tuluba. Asen dak Khrista lira asenoki ajak akoktsü.

Asenoki Pa O nung metaloker asü masü? Yisui asenok dang Pai koda 'ya zülua lir' ta Lai O ajanga temenen maksüdakia sayu yamaji asenoki Pa O asen temezüing nung janga meteta ayutsü nüngdaker. Asenoki mojingji nokdang (asü masü? Yakob 4:7 'Mojingji nokdangang aser pai nenok nungi jena aotsü,'" Hudson Taylor, akhi China nung Missionary sang dang kari asüingdang, "Mojingji lir ta koda metettsü?")

Pai angzü, "Kenü anogo danga nai pa nokdangtsü merangang, süra nai metettsü" ta langzü.

Asenoki asen anogoshi taküm khuli ajanga temeneni koktetdar asü masü? Mark 5: 19. Kibubai na asoshi kechi inyak aji nai parnok dang shiang. Item rara sobotsütem agi asenok nangri kangshir aseni tongpangi aotsü tashi itshidi.

### SARASADEM:

Ni metsübuttsü, ni marendakli kechiyong Kibuba na temeranger aser nai ni rara nung anitsü. Amen.

# Spain nung Evangelical Khristan nütsüng arener

**September 20, 2023:** Spain tema lir.

nung Observatory of Religious Spain nung evangelical Pluralism-i linük nung Khristan nütsüng kanga Evangelical Khristan nütsüng renlokbaji Latin America nungi kanga arenba osang tamangertem aika aruba agi lir, metetdaksü. ajisüaka 2019 küm Evangelical

Spain nung yimsü balala Focus Europe report ajanga asadangtsü atema 2011 küm ashiba agibo, Evangelical Spanish Ministry of Justice-i Khristan nütsüng aika aliba Observatory ya tenzüka liasü. yimitemji Madrid, Barcelona

Spain linük temzüing ajanga aser Valencia yimitem dang lir senso ajak nem yimsü temeden aser Tenla ki teimbaka item agütsür. yimti nungji lir. Tetezü, linük

Spain nung maneni Catholic nung yimti mesüra yimtsüng Khristan nütsünga teimba lir, shilem 90 nungbo Evangelical ajisüaka tesüiba küm 20 tsüingda Khristantem indang tekülem ki linük nung evangelical Khristan ka danga mali.

nütsüng kanga renlokogo. Observatory report ajanga ashiba agi, 2012 küm tashi nung Spain nung tekülem ki ajak ashiba agi, 2012 küm tashi nung senteper 31,000 lir aser iba Spain nung nütsüng shilem 13 nungjagi Catholic nunger bo Tsüngrem dak tekülem ki 22,947, Evangelicals mamangertem lir.

2021 küm tashi nung Roman Catholic nütsüng shilem 84.7 Spain nung tekülem ki ajak ashiba agi, 2012 küm tashi nung senteper 31,000 lir aser iba Spain nung nütsüng shilem 13 nungjagi Catholic nunger tekülem ki 22,947, Evangelicals mamangertem lir. 2021 küm tashi nung Roman Catholic nütsüng shilem 84.7 Spain nung tekülem ki ajak ashiba agi, 2012 küm tashi nung senteper 31,000 lir aser iba Spain nung nütsüng shilem 13 nungjagi Catholic nunger tekülem ki 22,947, Evangelicals mamangertem lir.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Sali**  
(n) kozü, patio aser shinü meyokteper mejakba chiyongtsü ( mixture of betel leaf,areca nut and lime for chewing)  
\* Sali achirtemi kima yimdong kanga menentsür.  
**Salok**  
(v) tango tamajung tebok nung Atem ( gas form that upsets stomach)  
\* Aon temekong junga melemlashi achiba agi ni menen salok.

**OLONG PAITEP # 6643**

1		2		3		4		5
			6		7			
8								
					9			
		10						
11								12
				13		14		
15								
16						17		

**TIPIEN**

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

**LANGTSÜNGLEN**

- 1. Jila tulu - (5)
- 2. Sarasadem dang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüng dang masü - (5)
- 14. Jabaso masü - (4)

**OLONG PAITEP # 6642 TELANGZÜBA**

**TIPIEN :**

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

**LANGTSÜNGLEN :**

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

**NAI-A YA METETTER MA**



Tang Lok Sabha züngsemtem rongnung tambusangji arishi küm 93, Samajwadi Party nungi Shri. Shafiqur Rahman Barq aser tanubusangji arishi küm 30 tain Smt. Chandrani Murmu, Biju Janata Dal (BJD) party nungi lir.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**



- 1. Tenüing : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

Meghalaya nung Rs 200 crore jenjang drugs apu  
**Shillong, September 20, 2023 (Agencies):** Meghalaya nung tesüiba küm pezü tsüingda police-i Rs 200 crore tema alangba drugs puogo ta Meghalaya deputy chief minister Prestone Tynsong-i ashi.

Meghalaya police-i 2019 nungi tenzüker tang tashi nung Rs 223 crore alangba drugs puogo, ta Tynsong-i ashi.

2019 nungi September 6, 2023 tsüingda Meghalaya police-i Rs 223 crore alangba drugs aser psychotropic substances apu.

Nongpoh MLA Mayralborn Syiem-i assembly nung zero-hour notice benoka jembidang Meghalaya deputy chief minister Tynsong-i iba osang metetdaksü.

Tesüiba küm pezü tsüingda Meghalaya police-i heroin 32,555 grams, cannabis 8479 kilograms, opium 2796 grams, crystal meth 81 kilograms, codeine cough syrup 57,802 bottles aser psychotropic substances 15,396 apu.

Iba dak sendakba nung Meghalaya police-i ken o 515 benokogo aser tebur 826 aser tetsür 109 apu, ta Prestone Tynsong-isa metetdaksü.

**Imphal valley nung ghonda 48 mokdangba ajanga timtem ajuru**

**Imphal, September 20, 2023 (Agencies):** Manipur kübok Imphal valley district tem nung Meira Paibi temi ghonda 48 mokdang ayongba ajanga Bodbarnüa shisaliok rejutem, shishilembadak aser bank ajak shibangogo.

Tanü agi anogo tanabububa parnoki mokdang ayongba ajanga sorkar office tem nunga mapa inyaker kanga ajema liasü aser lenmang nung gari tera dang senzüogo.

Police-i "village defence volunteers' pungu apuba chiokang ta takhangba agüja Meira Paibi tem aser local club 5-i mokdang ayongzüik.

Imphal Valley kübok district pungu nung tetsürtemi

**MOLUNGNEN O**

Onoki teti meima aliba Lt. Tekasangba Ao (Mangmetong) iba lima nungi pilar onok mangyim tejashi nung alidang kija, arogo, lokti tentet balala, kidanger, kinunger, tembar aser temolunger shirnokisa ozü dang temeim sayua nübu, shisatsü, sarasadem aser rongsen agi yaritepogo, nenok ajak dang ozü temolung taroktiba nungi pelaba lemsateper.



Aso: 01-01-1967  
Asü: 16-09-2023

Nenok kija shia tenüing amshia pelaba meshitetba asoshi sasa bilemer, ajisüaka asen Tulusang Tsüingremi nenok ajak mulamoshia moatsütsü ozü sarasadem.

- Temeim kinungtsü, jabsotem aser kinungertem.

**Arunachal nung Keyi Panyor district tasen akümtsü**

**Yazali, September 20, 2023 (Agencies):** Arunachal Pradesh nung 16 Yachuli constituency nung alirtem atema osang tajung ka lir aser ibaji 'Keyi Panyor' ta ser district tasen ka kümtetsüba lir.

Bodbarnü senden ka amendang Chief Minister Pema Khandu-i district tasen ka kümtetsüba osang metetdaksü.

Iba sentong nung Chief Minister Khandu-i 16 Yachuli assembly constituency kübok mapatong 34 sayatsü aser ano mapatong 33 inyaksü atema lung azüingtsüogo.

Yazali general ground nung

agiba sentong nung BJP state president Biyuram Wahge, minister Felix Bamang, minister Taba Tedir minister Tage Taki, MLA Phurpa Tsering, MLA Nyamar Karbak, MLA Ojing Tasing, MLA Hayeng Mangfi aser MLA Gokar Basar nung aden.

Parnok dak alia PRI züngsemtem, BJP karyakartas aser public aden.

Keyi Panyor district tasen akümba ya CM Khandu'er sorkari nübortem taginüba aser nüingdak ajiteta inyakba sayur.

Keyi Panyor district züngsema Arunachal Pradesh nung district 27 akümtsü.

lenmangtem noktang aser lanur pungu chiokang ta yimyim ayima lungkak ait.

"State sorkar aser police-i tenemlen law & order tiptema meyuteter. Police-i Imphal valley kübok district 5 nung nisungtem apur aser civilian dak tenük amdaksüba mokozü amshir saka Kuki nunger teimba ser aliba Churachandpur aser Kangpokpi district tem nungbo prangpong bener senzürtedang kecha mashir" ta Wangkhei nung lungkak aiter S Sakh-i osangbener dang ashi.

"Meitei yimtsüngtem anüksü aser Kuki Zo telungpur nungi kümzüka ayutsü atema village

volunteers' ayuba lir" ta Naoremthong nung lungkak aiter S Bebisana-ia ashi.

Honibarnü police-i nisung pungu ket nung prangpong bener aser camouflage uniforms agir lia apu.

Parnok ajak judicial magistrate tsüingdangi anir ao aser police ket nung ayutsü temelaba agütsüogo ta Manipur police-i ashi.

September 16 nü lungkak aitertemi lanur pungu chiokang ta takhangba agüja Porompat police station nungpoka atutsü meranga liasü. Idangji security forces-i injang khatok aser tenük amdaksüba mokozü amshidang lungkak aiter kar aser RAF personnel ka dena yiru.



Assam kübok National Institute of Technology (NIT), Silchar nung kaketshirtemi lungkak aitba angur. NIT campus nung third semester kaketshir ka sosetba sülen tensa mejungi kuma lir aser kaketshirtemi Tir Droupadi Murmu dangi shidi ka zülüogo. NIT-Silchar kaketshirtemi Tir Murmu dang Dean Academic-i kaketshirtem nem timtem agüja arur aser Director Dilip Kumar Baidya-i pa teinyaksü mapa meinyakteter ta shidi nung shia lir. Arunachal Pradesh nungi Koj Buker sosetba sülen tensa mejungi aküm. Pa ya NIT-Silchar electrical engineering department nung third semester kaketshir ka liasü.

**OFFICE OF THE  
VILLAGE COUNCIL LAKHUNI**  
P.O: Mangkolemba, B.P.O: Alongtaki  
Dist: Mokochung, Nagaland

Ref..... Date: 20/09/23

**SANGDONGER**

15th September 2023 NSCN/GPRN AO Region CAO Court nung Lakhuni Senso tajung ka Mr. Imchawati dak züka merenshiba atema Lakhuni Ayim asem Yimteni khukhua aitsür.

<b>S/d- Chairman Lakhuni Village Council</b>	<b>S/d- Chairman Alongtaki Village Council</b>	<b>S/d- Chairman Lizo Model Village Council</b>
--	--	---

**OFFICE OF THE  
KOHIMA LONGJANGLAR TELONGJEM  
KOHIMA NAGALAND  
TENÜNGSANG AGÜTSÜR**

Kohima Longjanglar Telongjem ajanga Wt. Akumla Chuba W/o P. Sendongmeren IPS (Retd.), lai Indian Administrative Service jenjang ngutetba asoshi la nem konang nüngsang aser tetushi tulu agütsür. Asen Teyanglur Tsüngremi la taküm aser wadang maneni moajangma



<b>Sd/- Lipokmenla Imsong Tir, KLT</b>	<b>Sd/- Temsumongla Jamir Tezulula, KLT</b>
--	---

## Russia temenen dak temolung alemla masü: Zelenskyy

**New York, Rongjui/Sept. 20 (Agencies):** Ukraine Tir Volodymyr Zelenskyy-i alima dang Russia-i par linük anema tashiyim amshiba tembangdaksütsü asoshi lungjemtsü ajungshia UN General Assembly nung jembidang "Temenen dak tamang akala masü," ta ashi.

New York nung temolung arütsüka jembidang, nuclear aliba Moscow-i alima tatembangba rara leni nung aoba anendaksütsüla, ta Zelenskyy-i ashi.

Chiyongtsü nungi energy tashi Russia-i ajak nok-nü ama amshir, ta pai tai tongloksü.

Russia-i tashi ajak amshia Ukraine amakba mechi alimai aitsü.

Alima asoshi Russia dak lendong tulu keta aliba nung rangloker jembidang, Moscow meyipa yokba sülen ang tzi-mopung melenba ama danga ken o payimi jembitettsü, ta ashi.

"Russia-i alima ya rara tatem kati nung aodang, Russia-i tashiyim amshia amakba sülen alima nung shinga linükia shinga mamaktsüsa Ukraine-i inyaker," ta Zelenskyy-i UN General Assembly nung dena aliba alima lenirtem dang ashi.

Russia-i nuclear nok-nü amshitsü tashi temeden mali, ta pai ashi.

"Weaponisation ya soittsüla, raradang mapang tamajung inyakba merenshitsu, danga

leni yokker aliba nüburtemkidangi meyipa shilangtsüla aser tashiyim amshia linük atsüngertem pei limai meyipa aotsüla. Aji ataloktsü asoshi asenok lungjemtsüla, aser asenoki aji inyaksü!" ta Zelenskyy-i ashi.

Moscow-i Ukraine nung tanurtem pua bener oa kin ajunga samadaksütsü mapa inyaker, ta pai tai tongloksü.

Ukraine nung tanurtem ozüing alemla Russia-i yokba nung tai tongloksia March ita International Criminal Court (ICC) ajanga Russia Tir Vladimir Putin aputsü totuyuba agüja liasü.

Ukraine-i tai tongloksüba Moscow-i khenyongi magizüker, saka Russia-i Ukraine nung 'war crimes' inyakba kuli tali anguba indang international experts aser organisations temi ashir.

Ukraine tiri rara temdaksütsü meranga tezüngzüktep meshidak magitsü tekumdangtsü ashi, koba World War II sülen Europe nung rara tulutiba alitsü.

Ajisüaka pai jembiba onüktem rongnung tongtipangbaji iba rara agi ajak dak kongshitsü ta alima nüburtem nem angatetdaksüner.

Russia nükjidongji Ukraine ya na aser ozüing nung amendaker international order anema nok-nü ka kumdaksünüta liasü, ta pai ashi.

Ita aika nungi yimjung sentong balala yanglua aruba ya Ukraine atema dang masü saka alima rangben asoshi lir, ta pai ashi.

Iba ojang ya talisa Brazil aser India densema "Global South" ta ajaba linüktem dak rangloker ashiba lir, shirnok tanü tashi iba rara asoshi ola madoker.

Linük aika rongsenketzüng tsütsü Kremlin den tesendaktep akangshiogo.

Anogo tetenzüklen Ukraine tiri Joe Biden-i o jembiba tentingsang agüja liasü, kong US tiri Russia-i tashiyim amshiba manendaksüra takoksa tulu alitsü, ta tekumdangtsü shia liasü.

"Alima anibeleva akumtsü aser timtem kecha melie Ukraine samatsüdaksütsü ama Russia-i bilemer. Asenoki Ukraine ya samadaksüra, linük ajunga indang temeden kumzuka mali," ta Biden-i shia liasü.

Külen Iran Tir Ebrahim Raisi-i Ukraine nung rara tesashiba akumba atema Washington aitsü. Iran-i Russia nem combat drones agüja lir aser Moscow asoshi tongtipang tembar ka ama züngshir.

"European linüktem tashi ajemdaksütsü mechi United States of America-i Ukraine azüdokshi milak tali jangrudaksür. Tia maka iba sentong mapang talangka asoshi lir," ta pai New York nung adenshia aliba alima lenirtem dang ashi.

## MENUNGRA BILEMTETER



**Tasüba anogo: 21.09.2022  
Asür LONGRINÜKSHI LONGKUMER (LIROYIM)**

"Kibubai temulungjang teraksa anebtsür aser parnok zübu alentsür" **T. Ken 147: 3**

Tasüba-i akümüli tembangtsüaka, Kodanga amatsü makokba ne temeim aser temoatsütem nden teti dena lir aser Tanü na taküm ali ama bilemtetta Tsüngrem tenüng asanger.

~ **Temeibatem, Kinungtsü, Chirnur  
aser Kinungertem**

## Azerbaijan aser ethnic Armenian force na ceasefire atema molungtepogo

**Baku, Rongjui/September 20 (Agencies):** Nagorno-Karabakh nung Ethnic Armenian forces-i ashiba agi, parnoki Russia-i ceasefire asoshi benokba molunga agizükogo.

Azerbaijan-i iba tesem amokbangtsü atema anogo ka tejak dang amak tenzüka Armenia nung telungpurtem bendanga agütsütsü asoshi akhangba sülen anogo ka lir ceasefire benoka liasü.

Ceasefire asoshi molungtepba ya Bodhbarnü 1:00 ako (09:00 GMT) nungi benoka liasü aser iba osang ya Azerbaijan indang Ministry of Defense-ia jangjatsüogo.

Tir Ilham Aliyev office sangdong ka ajanga iba tesem Azerbaijan nung adentsü atema Armenian separatists tem den Brehostibarnü Yevlkhah jila nung sensaksemtsü asoshi sentong aliba metetdaksüogo.

Russia indang Ministry of Defence-ia sangdong ka ajanga telok ana tsüngda ceasefire benoktsü atema molungtepba osang metetdaksüogo aser ashiba agi, iba tesem nung amenoka aliba Russia nung sepaitem den sendaktepba ceasefire ya benoka inyaksangshitsü.

Russia indang Interfax news agency sangdong ka ajanga ashiba agi, Armenia indang army tanungba unit tem Nagorno-Karabakh nungi atsüngintsü aser Karabakh telungpurtemia parnok indang prangbong hadirtem bendanga agütsütsü molungtepogo. Iba ya shitak benoka inyaksangshi asütsü masütsü iba indang osang mejangja. Armenia-i ashiba agi, 2021 küm August ita nungi iba tesem nung parnok sepaitem amenoka mali.

Nagorno-Karabakh ya Azerbaijan nung shilem ka ta alima kintemi agizüka lir, saka iba tesem nung nütsünyongsük 120,000 aliba ya timba Armenia nung lir. Iba tesem atema sorkar balaka amenoka lir, shirnok kidanger Armenia den tesendaktep tajung ya aruogo, ajisüaka United Nations nung züngoksema aliba linüktemi officially-bo agizüka mali.

Azerbaijan nung sepaitem kar tepsetba sülen Mongulbarnü nungi parnoki military operation ka tenzüka liasü.

Parnoki ashiba agi, parnoki military amenoka aliba tesemtem dak dang rangloker inyaksangshir, ajisüaka regional yimtiba nung teraksatsüba

adokba nguogo, kong dokantem kichiba raksar aliba, garitem puncture sür aliba nguogo. Osang ajanga ashiba agi nüburtema karbok tepsetogo.

Bodhbarnü ethnic Armenian forces-i ashiba agi, Azeri sepaitemi arrtsü adena aita tongtibang tesemtem aser lenmang junction tem atsüngogo.

"Tang tensa apira alima kintemi rara tembangdaksütsü aser tensa süngjemshidaksütsü atema jenjang agiba ya teperi masü," ta ketdangsürtemi ashiba Armenpress news agency sangdong ka ajanga metetdaksü. "Iba dak ajemdaker Republic of Artsakh ketdangsürtemi ceasefire dak sendakba nung Russian peacekeeping contingent-i benokba ken o agizükogo."

South Caucasus nung amenoka aliba iba tesem ya Azerbaijan aser Armenia napronglai parnok meyong ta shia arudar aser 1990s nung Soviet Union chirepba sülen iba tesem atema linük ana ya anaben tashi raraogo.

2020 küm tanabuba rara ya anogo 44 tashi raraba sülen Nagorno-Karabakh aser temeket nung Azerbaijan-i tesemtem atsüngba sülen tembanga liasü.

## China-i ano Taiwan anasai tayimtsü aser rong yok

**Taipei, Rongjui/Sept. 20 (Agencies):** Tanüa Taiwan meketa Chinese warplanes ter dak tema senzüba puzükogo, ta pei sasa yimsü asüba asetkong indang defence ministry ajanga Mongulbarnü ashi aser Beijing dang rara mesüba mapa inyakba anentsü ayongzük.

Deobarnü nungi Hombarnü tsüngta ghonda 24 nung China-i raradang amshiba tayimtsü 103 tashi Taiwan müketa yimzüdaksür lia ano Mongulbarnü ibai ataloka liasü.

Hombarnü nungi Mongulbarneep tashinung asetkong müketa China indang tayimtsü 55 aser tziyüm sepaitem indang rong tulu tenet senzüa liasü, ta Mongulbarnü ministry ajanga ashi.

Beijing-i Taiwan ya par indang litsü ama jembir aser künü anogobo agitsü ta ashir.

Regional security tamajungba kumdaksütsüsa aser tensa tali mejungi akumtsüsa China-i rara mesüa mapa inyaker, ta Taiwan indang ministry ajanga Mongulbarnü shia liasü.

Raradang amshiba tayimtsü 55 nungi tesadang ka Taiwan Strait indang median line ta ajaba alemla aruba putet, koba agi iba asetkong aser China sadanger, aser ozü indang southwest aser southeast air defence identification zone (ADIZ) telungi ait, ta Taipei-i ashi.

Hombarnüa Taiwan-i China dang tangsa iba ama teraksa adoktsü inyakyim anentsüla, ta ajungshia liasü.

China indang foreign ministry nungi Hombarnü inyaksangshiba indang sangdong kecha agüja mali saka odongtar Mao Ning-i Taiwan ya China meyong ta Beijing-i nokdakba akangshia ashi.

Beijing-i median line mali ta nokdakba lai nenshia shia liasü.

Anogo ishika China nung raradang amshiba tayimtsü aser rong tali aruba Taipei-i sangdonga arur.

United States aser Canada meyong rong ana Taiwan Strait ajanga aoba sülen sepaitem saksalema lir, ta Beijing-i taoba hopta shia liasü.

## NSF Trophy: Medziphema Royal FC aser Patkai Christian College nati takok angur



23buba NSF Martyrs' Memorial Trophy nung asayaba noksa angur.

**Kohima, Rongjui/September 20 (TYO):** 23buba NSF Martyrs' Memorial Trophy nung Bodhbarnü Indira Gandhi Stadium nung Medziphema Royal Football Club aser Patkai Christian College nati takok tajung ngutetogo.

Bodhbarnü mezüngbuba asaya nung Medziphema Royal FC-i goal 3-1 agi Fixate FC madak takok ngua liasü.

Iba asaya nung Visalie Mezhü-i (10) minute ana nung

Medziphema atema mezüngbuba goal idaktsü, koba tang tashi nung iba asayamung goal takaratiba idaktsüba asütsü. Iba sülen minute 5buba nung Mangal Gurung-i (13) tanabuba goal idakja liasü. Asaya tanabuba shilem nung mapang apuloktsür asayaba mapang Seiminthang-i (4) par team atema tasembuba goal idakja liasü.

Fixate FC atema goal ka ya Shamba Samson-i idakja liasü.

Asaya nung MRFC nungi

asayar Mangal Gurung aser Rokolhoukho na aser Fixate FC nungi Along Daniel aser Jenpu Kent na nem asayar yimya shitak mebeshiba atema yellow card agüja liasü.

Tanabuba asaya nung Patkai Christian College-i goal 4-0 agi Pro\_D FC koka liasü.

Patkai Christian College atema mezüngbuba goal ya Enebe Thopi-i (30) minute 13buba nung idaktsü aser iba sülen Pro\_D FC nungi asayar Akito A. Yeptho-i own goal ka idaktsür asaya mezüngbuba shilem tembang.

Minute 70buba nung PCC nungi asayar Ningpao Khiam nem red card agüja parnok asayar 10 dang kümaka PCC puri asaya maneni amokbanger asaya aser minute 73buba nung Thopi-i par team atema tasembuba goal idaktsü aser Lengpan Konyak-i (22) goal pezübuba idakja parnoki asaya ayong ayonga akok.

**September 21 nü asayatem:**

1. N.K Brothers vs A.Yhome FC @ 11:30am

2. Reipicüzie FC, Mezoma vs United FC, Piphema @ 1:30pm.

## Nagaland nungi cadet 3 Subroto Cup atema shimogo



**Dimapur, Rongjui/September 20 (TYO):** Dimapur nung amendaker aliba 1 Nagaland Air Squadron NCC nungi junior wing cadet asem, Directorate General of NCC Football Team nungi Subroto International Football Tournament (Under-14) nung asayatsü atema shimogo.

Cadet tem ya Riyang Military Camp, Arunachal Pradesh nung trails agiba sülen team nung asayatem shimtsü asoshi training aser asaya nung shilem agia liasü. Nagaland

nungi cadet asem ya Pilgrim School, Dimapur nungi Anguka Yeptho, DPS, Dimapur nungi Cadet L Eyilo Fabian aser Cadet Tongtiser Longkumer nunger lir.

Cadets temi bendanga agüja meranga inyakba den tsürapur aser tesayurtemi parnok kanga nongita yariba ajanga team nung parnok züngoksemtetogo, ta Ministry of Defence, Manipur, Nagaland aser Southern Arunachal Pradesh PRO & Spokesperson-i sangdong ka ajanga metetdaksü.

## Tim Southee World Cup nung masayatetsü akok



Tim Southee

**Rongjui/September 20, 2023 (Agencies):** New Zealand nunger fast bowler Tim Southee, temeyong yiruba sülen surgery agitsü lir aser pa World Cup nung shilem agitettsü mejangjai kümogo.

Southee World Cup nung shilem agitsü agitsü magitsü iba indang telemtetba ka taruba hopta agitsü, ta New Zealand Cricket (NZC)-i ashi. Taküm World Cup ya India nung October 5 nü nungi tenzüka asayatsü.

Arishi küm 34 tain asayar ya Hokolbarnü England den asayaba mapang ball ka aputsü merandang temeyong jemtsüba yirua liasü.

New Zealand pur World Cup nung mezüngbuba England den asayatsü hopta ana anunga lia Southee Brehostibarnü surgery agitsü.

"Surgery agiba osang anguba sülen pa taruba ICC Cricket World Cup nung shilem agitettsü magitettsü, iba indang telemtetba ka taruba hopta

agitsü," ta NZC-i ashi. New Zealand head coach Gary Stead-i ashiba agi, test captain Southee World Cup nung asayadaksütsü atema takokba tashi maongka agitsütsü.

"Tim surgery junga agitettsü imlar atar," ta Stead-i ashi.

"Pa teka tachichilen jemtsüba nung pin mesüra screw kar inoktsütsü. Surgery takok ngua agitetaka Tim-i asaya tenzüka mapang tashiba aremstsü maremstsü iba dak dang keta lir," ta paisa shisem.

New Zealand pur Brehostibarnü nungi tenzüka Bangladesh den ODI asem asayatsü.

England aser New Zealand na ODI asayamung taoba hopta Lord's nung tembangogo aser iba asayamung ya England-i 3-1 agi koka liasü.

Tatembangbuba ODI asayaba mapang Joe Root-i azükba ball ka aputsü merandang Southee yirua liasü.

## Champions League: Barca, City aser PSG nungeri pei tata asaya kokogo

**Rongjui/September 20, 2023 (Agencies):** Mongolbarnü Champions League nung Barcelona nungi João Félix, Manchester City nungi Julián Álvarez aser Paris Saint Germain nungi Kylian Mbappé nunger ajaki goal idakja parnok asayaba team temi takok nguogo.

Ajisüaka Mongolbarnü asaya ajak rongnung tajungtibaji Rome nung liasü, kong Lazio goalkeeper Ivan Provedel-i mapang apuloktsür asayaba mapang minute 5buba nung par team atema goal ka idakja Atlético Madrid den goal 1-1 ta kasasa nung tembanga liasü.

Mongolbarnü Manchester City pur goal ka chir aliba nungi meyipa arur Red Star Belgrade goal 3-1 agi koka liasü.

Asaya mezüngbuba shilem nung City puri goal nung 22 ben metsü ajisüaka parnok goal 1-0 agi tesülen liasü. Red Star

Belgrade atema goal ka ya Ghana nunger winger Osman Bukari-i idakja liasü.

Asaya tanabuba shilem tenzüklü Álvarez-i City atema goal ka idaktsü aser paisa tanabuba goal idakja liasü. Asaya nung City atema tasembuba goal ya Spain nunger midfielder Rodrigo-i minute 73buba nung idakja liasü.

Group G asaya tanga ka nung Leipzig-i goal 3-1 agi Swiss team Young Boys kokogo.

Kasa mapang nung Antwerp aser Barcelona na asaya nung João Félix-i goal ana, Robert Lewandowski ka aser Gavi-i goal ka idaktsüba den Jelle Bataille-i minute 22buba nung own goal ka idaktsüba sülen Barcelona-i asaya goal 5-0 agi kokogo.

Group H nungsa Porto-i goal 3-1 agi Ukrainian champion Shakhtar Donetsk kokogo. Russia-i Ukraine amakba ajanga

Shakhtar pur parnok indang home games tem Hamburg, Germany nung asaya arudar.

Maneni Paris Saint-Germain-i goal 2-0 agi Borussia Dortmund madak takok nguogo. Asaya nung Mbappé-i penalty ka ajanga mezüngbuba goal idaktsü aser Achraf Hakimi-i PSG atema tanabuba goal idakja parnoki asaya akok.

Group F nung AC Milan aser Newcastle na asaya goal kaka danga magütsüteti tembangogo.

Group E nung Atlético Madrid aser Lazio na asaya goal 1-1 nung tembangogo. Asaya nung mezüngbuba goal ya Atlético midfielder Pablo Barrios-i idaktsü, ajisüaka asaya atemtsü lia lazio goal keeper Provedel-i par team asoshi goal ka idakja goal kasasa nung asaya tembanga liasü.

Group E nungsa Feyenoord-i goal 2-0 agi Celtic kokogo.

## ICC ODI rankings: Mohammed Siraj No. 1 asayar kümogo

**Rongjui/September 20, 2023 (Agencies):** Tawa tembangba Asia Cup final nung wicket trok tashi agiba sülen India nunger fast bowler Mohammed Siraj, ICC ODI bowling rankings nung maneni temaba jenjangi tuogo.

Siraj ya January ita-a bowler tem rongnung temaba jenjang nung liasü saka March ita pa Australia nunger fast bowler Josh Hazlewood-i ajateta liasü.

Final nung pai kanga junga asayaba ajanga Sri Lanka

nunger asayatem nem run 50 dang yangludakja India-i wicket 10 agi asaya ayong ayonga akokba sülen Siraj ya jenjang ti tejakdangi tua tang temaba jenjang tongtetogo.

Kasa mapang nung India nunger left-arm wrist spinner Kuldeep Yadav jenjang asem asepzüka lua tang tekububa nung lir.

India nunger bowler tem rongnungi Jasprit Bumrah-a jenjang ana tejakdangi tua tang 27buba nung lir. Pa yirur ita

aika asaya nung shilem magi-i aruba sülen tang asaya tenzükgogo aser October ita asayatsü aliba World Cup nung pai India team atema tongtibang shilem agitsü imlar.

Maneni all-rounder Hardik Pandya-a jenjang ti tejakdangi tua rankings nung tang pa jenjang 50buba nung lir.

Maneni all-rounder ranking nung India nunger rongnungi Pandya kija top 20 nung lir aser pa jenjang ka tejakdangi tua tang trokbuba nung lir.

**BILEMDANGANG**

**"Taginüba ka asoshi imla mekazüi meranga inyang."**